

TARIKH : 2 JULAI 2024  
AKHBAR : UTUSAN MALAYSIA  
MUKA SURAT : 9

## Penyasaran RON95 dijangka dilaksana suku kedua 2025

# Penyasaran RON95 dijangka dilaksana suku kedua 2025

Oleh ARIF AIMAN ASROL  
aiman.asrol@mediamula.com.my

**KUALA LUMPUR:** Kerajaan dijangka melaksanakan penyasaran RON95 pada suku tahun kedua 2025.

Penyasaran bahan api RON95 dilihat akan memberi kesan negatif kepada negara sekiranya kerajaan melakukannya tergesa-gesa dan dibuat tanpa kajian impak menyeluruh.

Pakar-pakar ekonomi berpandangan, pendekatan yang diambil dalam penyasaran diesel tidak sesuai digunakan untuk RON95 kerana diesel kebanyakan digunakan pengguna komersial berbanding RON95 oleh 20 juta warganegara terutama B40 dan M40.

Penganalisis ekonomi, Profesor Dr. Barjoyai Bardai berkata, penyasaran RON95 memerlukan masa, iaitu kerajaan perlu terlebih dahulu membuktikan bahawa penyasaran diesel tidak menjejaskan inflasi dan harga pasaran.



**PENYASARAN** petrol RON95 dilihat boleh memberi kesan negatif kepada negara sekiranya kerajaan melakukannya secara tergesa-gesa tanpa kajian impak menyeluruh.

"Kaedah nak memberi subsidi RON95 dan menentukan siapa yang layak adalah satu perkara yang rumit, ia memerlukan data Pangkalan Data Utama (PADU) sempurna dan lengkap terlebih dahulu," katanya ketika

dihubungi *Utusan Malaysia*.

Beliau menjelaskan, penyasaran RON95 memang perlu dilakukan kerana aktiviti salah guna petrol itu masih berleluasa.

Bagaimanapun, beliau menegaskan, kerajaan tidak boleh

melakukannya secara terburu-buru supaya majoriti rakyat tidak akan terjejas.

"Dalam kes petrol, kesan daripada penyasaran akan lebih nyata dan besar, sebab itu ia memerlukan satu kaedah atau mekanisme yang rapi jika kita mahu mengelak kesan ke atas inflasi, kos sara hidup serta kesejahteraan rakyat," katanya.

Terdahulu, Perdana Menteri, Datuk Seri Anwar Ibrahim memaklumkan kerajaan masih belum memutuskan tempoh untuk melaksanakan penyasaran RON95 walaupun Menteri Ekonomi, Rafizi Ramli berkata, kerajaan tidak akan melakukan pengumuman awal seperti mana diesel.

Rafizi sebelum ini berkata, kerajaan akan menggunakan strategi sama, iaitu dengan tidak membuat makluman awal kepada umum berkenaan sebarang keputusan berkaitan penyelarasian subsidi RON95.

Dalam pada itu, Pengarah Program MBA, Putra Business School, Profesor Madya Dr. Ahmed Raz-

man Abdul Latif berkata, kerajaan perlu memastikan PADU dilengkapkan oleh seluruh rakyat untuk mengelak berlaku keciciran.

Malah, kata beliau, kerajaan juga perlu menawarkan alternatif kepada pengguna kenderaan persendirian, iaitu meningkatkan akses pengangkutan awam supaya mereka tidak terlalu terkesan dengan penyasaran RON95.

Katanya, kerajaan juga perlu meningkatkan jaringan sosial seperti menaikkan gaji pekerja tempatan.

"Kalau semua ini sudah tercapai, iaitu pendapatan rakyat sudah meningkat dan majoriti lebih memilih untuk menaikinya, barulah saya rasa kerajaan boleh lakukan penyasaran RON95 sebab rakyat dan negara sudah bersedia.

"Saya menjangkakan majoriti rakyat Malaysia akan menerima bantuan tunai untuk RON95 selepas kerajaan melakukan penyasaran iaitu merangkumi mereka dari kumpulan B40 dan M40," ujarnya.